

綠溪語

閩錫山書齋



山西省文獻委員會編

山右叢書初編

趙戴文題



編校姓氏

山西省文獻委員會總裁

閻錫山 百川

副總裁

趙戴文 次隴

徐永昌 次宸

常務委員

郭象升 允叔

馬駿 君圖

陳敬棠 芷莊

委員

賈景德 煜如

張友桐 曉琴

常贊春 子襄

狄樓海 觀滄

李鏡蓉 亮工

陳受中 乙和

邵修文 竹琴

陸近禮 恭齋

高時臻 福齋

李尙仁 網卿

甯超武 子高

賈昭德 宜之

徐鴻寶 森玉

顧問
編纂
任晰 亮裁

常乃惠 燕生

趙正楷 法真

方聞 彥光

田九德 玉如

原士才 石民

總幹事

于萬河 霞裳

幹事

焦陽三 養三

范士元 周君

常乃純 价中

校對

武敘疇 洪九

陳秀彥 元生

郭長民 漢鼎

邢淵經 伯涵

劉受福 百之

自序

士君子立言旨趣各有不同上之羽翼經籍闡明理學如漢晉唐宋大儒之注疏集解此立德者之言也次之通達政體講求民生利病如歷代名臣諸奏議此立功者之言也至於瑣綴曲說撫拾抄撮既無關於聖學亦罔補於經濟春鳥秋蟲時鳴時止何立言之足云乎雖然小說家亦有未易言者蓋非說之難而遇其時得遂吾說之難也予少爲父母所憐愛無饑寒顛沛之患及筮仕中州補任畿輔恭遇重熙累洽聖天子作之君作之師德與功各建其極經學昌明化理清平道德一而風俗同爲令長者奉行成憲易於爲治每當自公退食優游多暇而予朴拙無似於蒲博玩好弋獵竹肉諸技俱無能爲役環視鄴架卷軸塵封間取而讀之隨筆紀錄以爲談助蓋度德程功深愧言無足採又以淺見善忘亦難附於說部叢書之末然而訟閣餘閒操紙伸墨此時此景有非勞人悴士旁午瑣尾所可同年而語者沐浴光華之日月倘佯浩蕩之乾坤得

從事於吾說孰非國家泰和之氣庥嘉之運涵濡而醞釀之者與因釐爲綠溪
語二卷所以幸吾之遇也是爲序

大清乾隆四十二年六月下澣黎城靳榮藩書於蔚署之靜也軒

綠溪語上卷

山右叢書初編

黎城靳榮藩介人

楚辭以皐陶爲咎繇史記以皐陶爲大業論語左傳注以皐陶爲庭堅咎繇蓋
音之轉庭堅其字大業或美號如放勳重華之類耳尙書音義益皐陶子也列
女傳陶子五歲而佐禹曹大家注云陶子者皐陶之子伯益也秦本紀以伯益
爲大費又以大費爲柏翳而柏翳卽陳杞世家之伯翳也秦本紀以益翳爲一
人陳杞世家以秦爲伯翳之後又云垂益夔龍其後不知所封則又分爲二人
故索隱擬其謬誤國語史伯曰伯翳能議百物以佐舜者也注翳書作益伯翳
舜虞官少皞之後伯益也其說與索隱合以太史公之博雅猶有此失學者勿
輕言操觚哉

詩云刑于寡妻至于兄弟則文王當有兄弟矣而周本紀不載

漢高數項羽十罪以負入關之約王於蜀漢爲第一陰弑義帝爲第九是先私

而後公矣

范增之請立楚懷王與董公之請爲義帝發哀其術一也本非於楚有所愛特借以號召天下而已懷楚故君之諡也豈有君初立而以諡爲號者哉於理爲不經於事爲不祥增之智豈不足以知之蓋本爲項氏謀而非爲芈氏計增之有懷王與田單之有神師無以異故羽曰懷王者吾家武信君所立耳羽之報楚非如留侯之報韓也漢高爲義帝編素興師而不誅英布之罪且裂地而王之魯公沛公兄弟也

學義帝者史記以爲衡山王吳芮臨江王共敖漢書以爲九江王英布所載各異

○義非國號亦

非地名而以之號帝奚爲者陽尊爲義帝是不以之爲帝也後世稱兵曰義旗義師蓋本乎此非眞者爲義故五代史有義兒傳

呂后封蕭何夫人同爲鄼侯此非寵功臣之家也直欲爲呂嬃地耳因封呂產爲呂王而後封劉澤爲琅邪王因封呂嬃爲臨光侯而後封蕭何夫人爲鄼侯果寵功臣則不使告韓信彭越矣

以夫子爲先師之專稱自太史公始也書曰勗哉夫子子曰信乎夫子不言不
笑不取乎冉有曰夫子欲之齊宣王曰願夫子輔吾志吳越春秋何以異於衆
夫子之鈎乎鄒陽傳枚先生嚴夫子皆不敢諫列女傳欲以觀夫子之志耳其
得稱爲夫子者衆矣自有孔子世家贊而後之人無敢僭稱夫子者是亦有功
聖門處禮記之釋奠於先師先聖後漢書徐防傳之依先師皆泛言非指夫子也孔億傳之崇禮先師則指夫子明嘉靖中定孔子爲至聖先師於
是追尊其師者必舉姓字矣太史公曰吾過大梁之墟求問所謂夷門夷門者城之東門也

今開封府有兩東門南曰朝陽北曰含輝俗稱曹門宋門所謂夷門者孰是乎
史記封禪書少君言臣嘗遊海上見安期生安期生僊者通蓬萊中合則見人
不合則隱而田儋傳贊齊人安期生嘗干項羽項羽不能用其策干項羽者卽
啗棗如瓜者耶抑安期生不合則隱迺爲僊者或少君實無所見而鑿空耶又
樂毅傳贊河上丈人教安期生安期生教毛翁公毛翁公教樂瑕公樂瑕公教
樂臣公樂臣公教蓋公夫蓋公爲曹參之師而參與項羽同時計安期生教毛

翁公日其不合則隱久矣何又以策干羽也將有兩安期生耶

史記陳豨傳漢兵擊斬陳豨將侯傲王黃于田逆下又曰王黃曼邱臣其麾下受構賞之皆生得既斬黃何又生得耶而樊噲傳亦有虜大將王黃語又豨傳以黃爲賈人噲傳以黃爲胡人

史記張蒼傳丞相匡衡其經以不中科故明習此可爲少年登科者下一鍼貶兼可爲績學者之勸

有明諸藩多以僻字命名或謂當國者有意爲之然而宗支繁衍命名易複如漢書所載楚元王交高帝弟也而又有博鄉節侯交梁鄉侯交代王喜高帝兄也而又有城陽共王喜葉平侯喜高平侯喜沂陵侯喜成獻侯喜趙幽王友高帝子也而又有菑川懷王友趙共王恢高帝子也而又有安道侯恢宜鄉侯恢陶鄉侯恢燕靈王建高帝子也而又有襄曉侯建臯虞侯建燕敬王澤高帝從祖昆弟也而又有虜葭侯澤他如臨江哀王闕齊懷王闕朱虛侯章東野戴侯

章宜處節侯章宜春侯成杏山侯成羽康侯成緝敬侯成東昌侯成浮邱節侯
不害陰安康侯不害就鄉侯不害楚孝王囂劇原節侯囂平干項王偃宜城康
侯偃被陽敬侯偃邯葦節侯偃新利侯西偃陽侯偃新處侯嘉蒲領侯嘉利昌
侯嘉安鄉孝侯嘉陵陽侯嘉方樂侯嘉祝茲侯延年中鄉侯延年而以光昌疆
慶名者各五六人亦足見西京宗牒之疎矣

宋書符瑞志漢高帝父曰劉孰嘉是爲太上皇帝母名含始是爲昭靈后此足
補史遷之闕矣然漢武帝名徹爲通明帝名莊爲嚴呂后名雉有野雞其以諱
事神可見而申屠嘉燕王嘉順陽懷侯嘉江都相程嘉趙相蘇嘉賈誼之孫嘉
何不爲太上皇諱史記呂后紀封呂嘉爲呂王呂更始爲贅其侯武帝紀詔曰
登封泰山至於梁父而後禪肅然自新嘉與士大夫更始何不爲昭靈后諱乎
後漢章帝紀注太上皇名熹一名孰嘉願以侯之博聞者

史記扁鵲渤海郡鄭人也徐廣謂鄭當爲鄭鄭屬河間索隱亦主其說周書黎

景熙傳河間鄭人也一統志以景熙爲鄭人將母同

太史公自叙司馬氏在衛者相中山張晏以爲司馬喜而漢時喜生談談生遷是與遠祖同名也

漢書食貨志王莽陋小漢家制度以爲疏闊師古曰莽以漢家制度爲泰疏闊而更之令陋小張文敏照曰顏註非也陋小者卽鄙陋之義言鄙陋漢制謂爲疏闊不詳備也案疏闊正與陋小相反下文云發三十萬衆欲同時十道并出一舉滅域外又云動欲慕古不度時宜此正莽之疏闊處猶云好大喜功云爾非以漢爲疏闊而欲陋小之亦非陋小漢家之疏闊也

漢書賈誼傳陛下之與諸公非親角材而臣之也與車千秋傳之數公灌夫傳之諸公晉書顧和傳之山賈諸公周顗傳之羣公皆本於詩之羣公先正然後世史法較密此等處無薄今人也

漢書鄭崇爲御史事貢公師古曰貢禹也漢書叙傳以董賢爲董公王莽傳嚴

尤陳茂與二公會二公縱兵圍昆陽論衡兵出昆陽城擊二公軍二公謂王尋王邑也後漢書樂恢何敞傳論袁任二公正色立朝謂袁安任隗也袁安傳論袁公竇氏之間乃情帝室贊曰袁公特重誠單所奉陳寵傳論陳公居理官則議獄緩死晉書禮志江彪議稱桓溫爲桓公山濤傳贊非山公之具美其孰能與于此者哉五行志太康十年戮害二公二公謂張華衛瓘也楚隱王瑋傳二公潛圖不軌詔免二公官南史南平王偉傳梁政漸替自公薨焉北齊魏收傳任沈俱有重名邢魏各有所好武平中黃門郎顏之推以二公意問僕射祖珽又高乾封隆之傳史臣曰高封二公無一人尺土之資宋史劉黻傳還太學未幾侍御史陳垓誣劾程公許右正言蔡榮誣劾黃之純二公罷出六館相顧失色按二公字雖本周書然北齊若直作之推語方合史體唐人修高封傳元人修宋史蓋亦沿齊人宋人之語而未追改耳

漢書霍光傳百官以下但事馮子都王子方等視丞相亡如也服虔曰皆光奴

明史之游七嚴年蓋爲近之然嚴嵩有文武管家不知渠見礬山先生作何狀耳

蘇武杖節人艷稱之漢書匈奴傳武帝使郭吉風告單于單于留郭吉不歸遷辱之北海上太初四年盡歸漢使之不降者路充國等於漢此在武以前也始元四年衛律迺更謀歸漢使不降者蘇武馬宏等此與武同時也然宣帝獨圖武於麒麟閣者武本名臣凜然有不可奪之操又與李陵皆名家子武之節因李陵而愈顯耳○李陵答蘇武書識者疑其僞托蓋其文頗綿密不似西漢之疏厚也然匈奴傳匈奴使大將與李陵將三萬餘騎追漢軍至浚稽山而猶欲竊比於范蠡曹沫此後人愛子長之史記而遂并寬假於子長之所薦者耳說者謂五言始於蘇李又有疑李詩亦後人僞爲之者吾欲刪李而存蘇也漢書枚乘傳養由基楚之善射者也楊葉之大加百中焉蓋距樹百步非指樹之某葉也百發百中其非一葉可知宋史周湛傳善射弩雖隔屋亦中的則更

奇然未有不見的而中之者當是兩屋相望或預定其的之所在

漢書西域傳驢非驢馬非馬若龜茲王所謂羸也此說部語不必入史

後漢書杜詩薦伏湛疏自行束修訖無毀玷其言束修當如馮衍傳束修其心之謂而章懷註自行束修謂年十五以上非詩本意何晏論語註以束修爲十脔脯引穀梁傳少儀爲徵朱子因之與詩疏各有所指詩蓋用夫子語而斷章取義耳

後漢書張酺傳竇憲爲大將軍威震天下尙書以下議欲拜之伏稱萬歲韓稜正色曰禮無人臣稱萬歲之制議者皆慙而止明史魏忠賢傳士大夫遮道拜伏至呼九千歲二事相類然稜得伸其清議後至三公而忠賢此事無斥言之者忤忠賢者輒死明之亡所以速於漢和帝時也

春秋書隱公元年後無不紀元者後漢書謝弼傳初平一年司隸校尉趙謙上訟弼忠節按獻帝紀書初平元年則傳誤也

謝恩字惟於朝廷用之范滂傳叔向嬰罪祁奚救之未聞羊舌有謝恩之辭趙壹傳貽書謝恩此創見也

後漢書郭太傳皆書林宗鄭太傳皆書公業蓋范蔚宗避其父名泰而以太代泰又以字代名也何顒傳因林宗而并字賈偉節岑晁傳因林宗而并字朱公叔義皆如是

後漢書周舉傳太原郡俗以介子推焚骸有龍忌之禁每冬中輒一月寒食莫敢煙爨老小不堪歲多死者是子推焚日古今異辭也

後漢書公孫瓚傳瓚具豚酒北芒上祭辭先人學士何焯曰瓚遼西人安得有先墓在北芒按瓚御劉太守到洛陽因欲隨劉徙日南故遙祭先人非祭墓也學士因下文有長辭墳塋語遂設此疑觀三國志改爲與先人辭於此義可見矣

後漢書歐陽歙門徒三千人牟長講學者著錄前後萬人魏應弟子著錄數千